

胥石詩存

原序一

著雍敦牂之歲故太史歸安吳牧園先生來主吾吳紫陽書院講席余以晚進謁先生先生鴻儒長德名重詞苑而獨折節與余交久之先生以疾辭去里居卻掃日與羣從子弟稱詩茗雪閒余時通籍翰林雖出處殊軌然希風仰止未嘗不在先生也今年春吳生胥石過余於葑溪老屋以其所作詩就質于余余受而讀之生先生之從季也少學詩于先生先生于詩主三唐斷斷不少假借而吳生之詩踔厲風發掉鞅于少陵昌黎之間卓然成一家言其斯爲善學先生者歟尊所聞而高明余以知風流之不墜也往余有國朝詩別裁之選窮

搜博采竊不自揆輒附于微顯闡幽之意因念太史先生以詩文名海內者垂四十年官京師時所往還皆當時名宿已而過大梁之墟浮江淮逾漢沔遊跡所至淋漓濡染然性特簡率有作輒隨手散去不自收拾以故流傳者絕少夫以余與先生同時所居相距百里論文談藝猶聞警欬乃手操鉛槧而于先生之詩至不能舉其一二則夫窮巷悄然之士抱其奇材委翳于荒榛斷梗以待論定于百年之後者可勝道哉吳生篤學嗜古博聞強識又況岷山導江源流具在先生之詩必有藏弃于什一者余旣得交吳生或因生以重讀先生之詩俾向者遺忘之愆得有辭于當世則生之所賜大矣

爰書之以爲序乾隆三十二年夏五月歸愚沈德潛書  
時年九十有六

按此集刻後二十有二年同縣嚴九能先生元照始  
長獲交胥石先生見此集讀之雖爲作序未能補刊  
訂入先生沒後嚴先生又爲撰墓志均載悔庵學文  
集中他日重刊是集嚴序亦當刻入因均識於此歸  
安吳堪

原序二

南雪草堂詩集序

悔庵學文

胥石先生生四十有一年當乾隆三十五年庚寅之歲  
哀其自少至壯乾隆十四年始至二十九年凡一十有  
六年之詩芟汰而采之計各體詩二百有五十有三篇  
爲卷四名之曰南雪草堂詩集計刻詩之時去予之生  
也尙四年予生兩年而先生舉鄉試遂遊京師比予少  
長知先生名然不得見其文詞又越二十有二年先生  
南還始獲交焉得觀斯集再請庚寅以後二十五年中  
之詩讀之則大半散佚蓋又不知其幾何矣先生長予  
四十有三年長先君且四年予固不敢與先生輩也顧

先生雅厚予予以不敏獲從諸老後所結納有年八十  
以上者以齒論先生居第五子年來杜門息交五十里  
而外往往有經歲不通問者獨與先生密先生家邑之  
十八都曰前邱予家十五都曰石塚相距二十里朝發  
焉夕可以還或摘小船或遞尺素談文藝論心素留連  
往返久而不厭五六年於茲矣先生詩法古人而不徒  
襲其貌意思深格律細抑歛才氣使帖然於字句閒妙  
處殆得之唐人居多讀之猶藉以見先民槩獲也集中  
所錄皆以餽名教表風義述祖德報知己牽率酬應之  
作十不存一其去取甚嚴少詹事嘉定錢公見之謂非  
苟然作者洵知言哉先生今年七十有二多疾予往候

之猶呼坐牀頭作劇談然多恩恩歸不能一昔留也秋  
深夜涼讀斯集數過此中似欲有所言乃篝燈疾書漏  
三下而畢寄呈先生宜有一言以教我矣同里後學嚴  
元照

胥石詩存

原名南雪  
草堂詩集目錄

卷第一

乾隆十四年  
起十九年止

古今體詩共六十二首

卷第二

乾隆二十二年  
起二十六年止

古今體詩共五十二首

卷第三

乾隆二十六年  
起二十七年止

古今體詩共六十八首

卷第四

乾隆二十八年  
起二十九年止

古今體詩共七十一首



胥石詩存卷一

吳興叢書

歸安吳蘭庭胥石子

千叟恩宴恭賦

龍御乘乾百福宜 重申異命 錫春祺陽回震旦增

溫煦 德普坤垠集耄耆樂盛鼓鼗聲坎坎籥羞珍果

寶離離蓬池道允欣頻到良衍 岡陵頌介眉

八卦體

右五世族祖胥石先生嘉慶元年與千叟恩宴恭紀詩一首先生嘗有自書恩承賜宴頌語云嘉慶丙辰元年恭遇 皇上侍奉 太上皇帝八旬萬壽循康熙六十一年 聖祖仁皇帝預行七旬萬壽盛典復開千叟 恩宴期與年老臣民同登 壽域臣吳蘭庭候選在都與逢殊遇 欽賜御製詩籐杖綬正荷包洵非常之榮幸也謹紀 天恩以昭光寵是詩 謹從御定千叟宴詩錄出他日有力重梓南雲草堂詩集當補入之先生著述甚多大皆散失聞有異他人刻之不存已名如考定元豐九域志為馮

編修集梧題名同邑嚴先生元照書先生五代史纂  
誤補後道及是事又杜牧之詩註本先生作今本亦  
題馮名其族譜文稿會稽章先生學誠致書稱其撰  
著不苟其爲周君永清撰廣親屬記周君故後章先  
生囑其子校刻不報此外有南雪草堂文集讀通鑑  
筆記考定大中祥符廣韻世均未見想俱佚亡矣抑  
族人或藏有秘本是  
不可知也吳堪謹識

雜詩七首

天運如循環日御無停轍快意聊斯須苦心多竭蹶沒  
世疾無稱及茲世未沒勿謂一絲微縶之帛盈匹無謂  
一羽輕積之軸可折

去古日以遠古人杳難期殷勤披簡素悠然或見之冥  
心托末契欲合忽復離但能師其意語言俱糟餽下士  
如蒼蠅伊伊良可嗤

駟車馳長道惡遲下車趨躑躅不能前叱馭仍登車閱  
歷既有定唯當任所如舒徐無窘步躁競有危途欲速  
反不達斯言誠遠謨

游魚涉大川不必載以舟神龜殼自遮不必覆以裘東  
門駭爰居太廟泣犧牛物苟違其性竭情適崇讎所以  
君子人道在不忤求

仁道本不遐從善乃如登不聞鷹化鳩但見鳩化鷹萬  
象生吾前感召由嘿成胡乃不自愛一擲賊其形吾生  
甯不化慎哉擇所憑

啄木殺積蠹於木大有德當其啄丁丁幾疑木之賊大  
任降斯人發聲徵於色庸知玉汝成天意不可測瑾瑜

非不貴乃藉宅山石

我有朱絲琴斲自嶧陽桐我有大古劒雪花淬芙蓉劒  
以懾百靈琴以和薰風抱質惡炫耀懷寶無窮通遐哉  
天地心冥冥隨高鴻

送春

小雨桃花漲輕寒柳絮風且拚今日醉及與好春同吳  
闕徒書鳳秦樓已葬紅人生足離別幽夢惜恩恩

晚坐

遶廬多夏木晚坐暢幽情宿鳥時時墮飛螢故故輕星  
繁占晝熱月滿借秋清爲念西疇苦桔槔徹夜聲

沈石田畫卷爲潘蘭皋先生題

軒窗幽幽走癭鬼瘦骨內熱如暴尫是誰示我畫一幅  
頓使火坑生清涼蒼崖厯亂千林表坡陀坐臥娛晴曉  
側耳諦聽疑有聲飛泉淙淙崖畔傾潑洄忽作一鏡平  
短棹悠然恣來去扣舷想見滄浪情沈侯天山筮周易  
相城竹莊抱孤寂興酣搖筆氣淋漓胸中邱壑歸端倪  
君從何處得此本出入懷袖常提攜嗟我見此神色動  
欲奪無如君貴重擬將幾百青銅錢買匹東絹光新鮮  
濡染雲煙張壁閒撫琴動操聲琅然嗚呼好手不可得  
卷畫還君空太息

月

以爾爲愁窟高高寄碧天如何照孤影復此淚雙懸王

子乘青翰佳人化紫煙只應皓魄裏彷彿見嬋娟

月夜放船至青螺庵因宿芝上人房

凡物無妍醜非其時不貴唯月具佳緒妙與四時會依  
宵作勝遊扁舟隨所屆星斗鬱寒芒川原滌清致舍棹  
叩禪關荒籬一犬吠老僧披衣迎邂逅見真契萬籟何  
蕭然竹柏影在地徘徊憺忘歸遂假雲房憩此心本淨  
明何人悟邊際雞鳴瞻東方精色發幽秘

貞女詞

有序

德清沈氏女字董生既請期生遽死女哀號欲絕遂  
絕勺飲母曰女殉節善矣願一死未塞責則上事尊  
章下立繼嗣使董生死而不死乃爲愈耳女蹶然起

復食虞嫫者董高祖母也以苦節聞其題畫菊詩曰  
移種春苗愛護周柴桑無主爲誰秋寒芳甘抱枯枝  
死羞見飄零逐水流女擇日歸董尊章以圖授焉爲  
賦貞女詞凡十解

東家有淑女習禮兼明詩幽居不出戶保此金玉姿  
亭亭百尺松下有女蘿草托生非同根因依願終老  
乘龍卜佳期嘉禮已在途添我眉間翠注我脣上朱  
錦帳垂流蘇中縣明月璫鴛鴦三十六和鳴東西廂  
良會不我從時命深相乖如何死生契中道忽崩摧  
重泉路幽陰孤魂淚潛然生既不相識死則長相捐  
淑女聞訃至泣血摧衷腸空庭來悲風寒日無晶光

拭我眉閒翠浣我脣上朱出門辭阿母上堂拜舅姑  
舅姑聞婦至淚下雙漣而延之所坐室授之畫菊詩  
新婦再拜受此心當永矢寒芳羞飄零甘抱枯枝死

觀潮

動靜互爲根江潮接海門駭機摧混沌秋信汨乾坤徒  
騁恢奇目誰招冤抑魂錢王毅弩處鐵騎尙雲屯

九日

籬菊凋殘紫豔稀登臨彌覺素心違炎涼歷歷秋垂盡  
風雨恣恣客未歸幾處賓鴻依水止無端落木滿郊扉  
王師已撤金川戍不用荒砧怨擣衣

讀蘇秦傳



蘇君相六國威權莫與爭特恐張儀至才力或相傾驅  
之使入秦激怒乃其名果畏從約破何不引同升助予  
呼將伯共濟得良朋棄材以資敵貽誤良非輕張儀亦  
知之感謝托拙誠圍蒲復取陝破從隨連衡誰云十五  
年函谷無東兵古來貪鄙徒大事難與成國計非所恤  
積慮圖尊榮世人有耳目乃爲聾且盲

西湖竹枝詞 二首

柳條嫋嫋花枝柔郎今何處作春遊莫向錢王遺廟過  
生憎小字是婆留

將郎比作天上月阿儂恰比是湖心月光何處不留照  
影落湖心爾許深

大雨

一自夏雨占甲子天乃久旱疑乾封小兒跳舞療猴犬  
羣巫奔走瘞圭琮土龍桐魚百不效請命乃比蒞撞鐘  
由田熬然心眼焦人鬼訛言殊喁喁虱臣再拜告天公  
天心愛物無不容農人血淚已如海沾灑莫救黍稷種  
桔槔戽水唯涸轍多方轉注九譯重高高在上耳屬地  
豈真憤憤徒癡慵驀然雷公怒砰礧掠檻搜壁鞭乖龍  
驚颼激謫拔老樹層雲嵯峨疊奇峰天地大陰迴異色  
旱魃避匿無遺蹤有如禹鼎象百物魑魅魍魎莫能逢  
翻河傾盆作大勢百川滔滔容朝宗絕簷承溜走不及  
穿屋奔注何洶洶濁溝瀉惡去不停平堦往來更憧憧

遐阡邇陌旣優渥繁誰之賜沛鴻溶大造無私天不言  
德怨胥泯蒂芥胸沾沾卻荷恩私被當厄而與情所鍾  
不逢憂患屢因躋康居豈識多歡棕飽喫晚飯無事事  
科頭赤脚哦長松斷虹反挂青嶂豁疎蟬變聲綠陰濃  
曠步平疇隨老叟泥滑不妨扶短筇向生蒙蒙土脈香  
龍鱗刻鏤畝橫縱四鄰興鋤各昏作勸耕笑煩黃與龔  
乃知哀眷貨不毛裂膚暴背憐疲農吾輩終身媿坐享  
養略動罕殮且饗太平機關喜有象五風十雨方敬共  
彼此一時非二天癘我活我判春冬願秉螟螣畀炎火  
亦迎貓虎祭水庸東南千里俱待澤雨師車應給追鋒

消息

消息分明夢未回三霄清露冷瑤臺茂陵巾笈仙無骨  
昌谷奚囊鬼有才六曲瑠璃和月展一聲鸚鵡奏花開  
若爲指與重城路梵殿鐘殘玉漏催

偶記

雨過理芒屨蹋破白雲堆主人拂石几一笑山花開

秋懷四首

霜風一披拂木葉如飛蓬枯除葬蕙蘭瘦沼冰去聲芙蓉  
由來時執然爾生植其窮秋堂闕無人生事托寒蛩哦  
酸有梗淚夢弱少歡蹤披衣坐歎息殘燈不能紅長檠  
自高張此意誰適從

吾思李謫仙千鈞求息機吾思劉醉侯荷鋪身相隨古

人托幽素雅意貴知希敗梧泣冷露愁蜚弔夕扉秋序  
方滯淫吾懷忽在斯安得騎鴻鵠振翅凌風飛  
霜叢引晨步衰艸相糾紛摧敗孰使然感慨難重陳黃  
花獨無言晚節莫與羣雖無劉生丹聊茲傾一尊采采  
盈懷袖念我素心人惜哉天一方欲寄道無因  
秋夜難爲晨秋雨難爲晴密寒織孤幃峭風翦衰燈巷  
寂砧思滿林虛葉意傾炎涼倏變候物化相催併人生  
各有志夢想徒回縈暗蟲又何知唧唧乃不平

### 菁山

春山如畫裏濃淡雜煙霞有客攜筇去言尋石逕斜亂  
泉橫短釣荒墅綴疎花欲就精藍宿魂清夢不邪

茗雪竹枝詞五首

兩槳春風送素舸吳娘自唱本鄉歌  
碧湖十里作明鏡  
白玉芙蓉插髻螺

采蓮女伴畫修蛾見客低頭忍笑多  
同是水晶宮裏住  
通詞無那隔微波

溪名茗雪各分流會合終看共到頭  
妾意已如顯山顯  
郎心那作浮塢浮

橫塘路接小溪頭九曲闌干是畫樓  
夾岸桃花紅似雨  
春心一片付東流

城北高峰是弁蒼城南高峰是道場  
兩峰相望不得語  
中有牽愁羅帶長

顧節婦詞 有序

家乘載顧節婦事婦姚莊里人歸景元爲室合卺之  
夕元已病未幾遂死婦屢求死不獲已而曰有兄公  
之子在則取而撫之以教以養既有室焉胡天不弔  
旋殞厥命而節婦亦聲銷氣絕矣一瞑不視私恨豈  
有窮哉感而賦此亦使采風者得以覽焉

妾何敢不死不死誰從夫子妾何敢死妾死誰爲圖續  
似血指淋漓心力摧兒復棄妾妾安歸百歲千秋今已  
矣長號一聲臥不起妾今生死兩無功黃泉悔不早相  
從

西湖偶吟

客裏閒愁未易銷  
穠花幾簇柳千條  
畫船盡日經行處  
又過西泠第二橋

草蟲

秋懷多戚戚  
憐女太分明  
衰草生元苦  
孤燈感易成  
吟當風色緊  
寫出露華清  
莫近寒窗下  
拋梭意不平

九日

西風吹落葉  
蕭然陟高岡  
令節古所尙  
瞻眺窮八荒  
濁醪手斟酌  
引滿累十觴  
雲物淒以惻  
曜靈忽西藏  
愧我衣裳單  
當茲歲序涼  
寒菊苦言清  
寒菊苦言芳  
持此菲薄衷  
蹉跎空自傷

空山



煙草春如許空山日又斜  
幽禽忽無賴啄碎櫻桃花

雲

已帶西窗雨還分南浦霞  
紫扶金母輦紅遶玉皇家  
密意常欺月閒情亦護花  
高唐誰賦得應解惜才華

九日

世事茫茫歲月遒江湖此日惜淹留  
一尊慷慨花霑醉千里情懷客倚樓  
旅雁只從雲外度殘虹不向雨中收  
秋風北渚無消息極目空餘帝子愁

蘇州

占盡三春景裝成七里塘  
柳痕妝闥翠花氣酒船香  
蹤跡方留滯湖山更渺茫  
塵纓聊可濯吾意在滄浪

雜詠

由來名德恨期頤直道依然史筆垂先祖心知王氏臘  
鉅公品重黨人碑登庸銳意占台宿翰墨閒情付柳枝  
剩有桂林門下士英英碧血照須眉

無錫泊舟

返照當水郭維舟春店前提壺上岸去踏碎楊花煙九  
龍何亭亭映水明嬌鬟目遇成心賞探奇豈無緣明朝  
理輕策試品第二泉

飛將恨

今將軍故將軍爾何人乃夜行霸陵一尉醉營騰飛將  
此時飛不度請君暫向亭中住惜哉故將軍才氣無與

儔束髮當大敵不得取封侯禍由殺已降此恨無時休  
醉尉何足道乃復斬之快私仇獨不見韓王孫王楚地  
淮陰少年作中尉

蜀相恨

羽扇綸巾何瀟灑諸葛君眞名士也草廬出身効馳驅  
臣本不求聞達者嗣子可輔則輔之君才十倍於曹丕  
月黑秋原風蕭蕭大星墮地千軍哭安樂公不思蜀

奇男恨

生封公死封王徐常李鄧沐與湯豪傑景附妖氛掃撫  
髀獨思王保保王保保爾何人鐵甲夜臥瀚海濱哀笳  
霜重吹欲裂明月中天一腔血天荒地老奇男死今後

莫余毒也已

鼓吏恨

孔文舉楊德祖兩兒之外無足數岑牟單絞衣楚楚鼓吏擊鼓丞相怒丞相尙爾怒何況碌碌表與祖士負才名多蹙蹙此茫茫者誰托足鸚鵡含悽一鶚哭覆巢之雛飲遺肉宏農老牛方舐犢

賦得柳花送別

頗訝風流盡飛花忽墮檐遺蹤隨夢杳別淚與時添古渡春雙槩孤村雨一帘天涯誰爾主飄泊任猜嫌

果羸

小蟲有果羸簾隙挨身至筠管忽借棲掃除絕纖翳堂

搆力維勤似續謀方締徘徊桑樹枝蠕動羅而致支體  
僅完全神魂如夢醉祝之使類我眼穿日以幾吾思大  
化內網緼唯一氣靈蠢肖其元百物自衍遞奈何強異  
質改族冒世次昔聞陽翟賈居貨算倍利卒以美人子  
致素羸呂嗣典午板蕩日五馬走避地中有一太牢系  
乃出小吏民不祀非族神不歆非類華封祝多男猶懼  
爲身累況乎取非種已出更不啻無乃瀆彝倫兼復昧  
名義小蟲彼何知作詩聊警世

吳蠶六十韻

吳地分星野蠶功任土宜閭閻常竭作妾子寔專司敦  
本農偕勸躬桑母是儀龍精仍變化馬首更權奇好繼

西陵業還廢七月詩煙村何悄悄晴晝正遲遲槐火清  
明換錫簫斷續吹新萍香掩冉細麥影參差粉社觴浮  
蟻茆堂薦伏雌大昕曾賜浴曲植沉先治爆竹多禳虎  
彎弧亦禦魑辟人聲標片紙卜宅襲重帷鞠育藏於密  
網緼數既滋辨名區庶類善頌諱纖疵蠕動方嬌怯鴻  
毛効指麾凝神蜩掇僂學視虱縣輦柔葉聶而切遠揚  
斧以斯舍西芳逕遶墻下綠陰垂剪想金交股鉤憐桂  
折枝中阿勞弭節千騎漫陳辭芣苢婦人樂蘋蘩季女  
尸拈花嫌稚妹摘樾媚佳兒待哺怒如擣加餐喜可知  
勤施兼穀食穩送比牛同彌覆天垂象平均風美鴈聞  
馨從臍蠶染指劇委蛇乍擬蟲鑄柳旋成馬踏葵飲河

憑偃鼠遷蜀爲蹲鴟一飽生涯遂三眠物候移形神殊  
磊砢稱駢較銖錙駒隙行將逝菟裘堪自怡須教蝸縮  
殼彌信豹留皮若輩宜高閣先人有舊貲蘆簾鋪帖妥  
藁束接崇卑督力爐添獸威姦廡繪狸紐雙峴合志蝓  
獨耐抽思炎帝乘新令薰風近曲墀絜樽老婦祭增竈  
族人炊揚沸煎何急親縲樂不疲引繩咸就理轉轂乃  
從維只費纏頭物空存走肉屍保民煩尹鐸抱布刺氓  
蚩恍氏煉諸井青州貢並絺焚機眞魯相恤緯歎周葵  
比素蘼蕪句回文蘇蕙詞璇宮禁寂寞鮫室鑱淪漪復  
訝神鍼運甯愁拙目嗤元黃才試染刀尺未停披給服  
享天祖垂裳傲燧犧王言宣誥敕國事別旌旗加璧朝

尊德承筐宴示慈未多青鬬段休羨紫駝尼托業聊泚  
澣安貧復縞綦大哉功必徧允矣利兼資果碩不終剝  
瓜絲會有期留良徵犢角繼體得蛾眉纏縛誠膠固行  
藏孰挽推翼成還掘閱物化等斯彌訢合婁豬定馮生  
燕卵遺卷懷遵養晦閱鷲待來茲

蕭然

萬古成陳迹蕭然任去留小軒聞墮葉今夕是新秋弦  
月清如洗繩河淡欲浮素琴聊在御撫枕思悠悠

城南山中有趙王墳相傳爲南宋諸王葬處

空山秋色渺無痕衰草離離細路分一樹冬青零落盡  
此閒留得趙王墳



中秋、

南樓誰見月北渚定生波令節仍風雨清尊自嘯歌窗  
虛燈暈薄蟲語夜深多應有巖前桂幽香未折磨

觀鷓鴣捕魚

船載鷓鴣來鷓鴣聲洶洶江湖入清秋天水大一統褪  
紅憐枯蘗抽白喜積葑百餘驟合圍兩舷占提封屬王  
比漢賦振鷺擬周頌羸蛤飽荆蠻歇驕狎秦雍短繩聊  
羈縻長竿憑發縱追逐互奔騰往來兼錯綜深汨排鳧  
葵突聳犯雞壅得雋何奮迅爭雄莫隴胸頗効鷹隼搏  
或致蛟鼉恐魚麗方學鄭鵝鵠不羨宋戴石猴爲糧遶  
垣羊可種豈有熊蹯館那許虱逃縫噤填空大嚼肱麾

得朋從萬鍾出而哇三瓠受以訟數俘乃均收擊鮮誰  
佐饗已是几上肉堪作刀下用宿屠韓侯燕歸鎬吉甫  
誦烹飪有常須鯢鮪非正供甯聞僂鯨鯢而不赦愚蠢  
多殺尙首功薄酬給半俸徒夸人力強不思物命重至  
仁戒暴殄此理本大共

夜雨

夜雨關何事斐然意不勝懷人千里夢伴我十年燈壁  
冷蟲多咽林虛秋自矜一尊方獨進判著醉曹騰

十月中于小鷺字圩分稻

有序

薄田數畝近在舍北鄰曲老叟任種植之事每秋成  
割稻分之今歲八月霖雨淹時頗有新穀不登之慮

茲雖收入已薄然始願正不及此輒復寄詠

人生各有役嗟予無能爲薄田三四畝荒穢長不治比  
鄰有老叟代予種植之春夏常力作胼胝非所辭所幸  
秋潦餘禾稼未全虧村墟見炊煙鳴雞當午時鉅父聊  
可觀任負欣在斯旣賴鄰叟力復荷皇天慈春秫具美  
醕澄清貯罌罍叟能從我醉暇日以爲期

醃菜

瑤草滋元圃瓊枝擷碧叢撒鹽形類虎踏雪爪留鴻屈  
到甯忘芟周生苦憶菰夙緣聊托命熱腹自虛中家釀  
傾三白新炊雜二紅此時誰見賞願我實難工長檠燒  
銀蠟鉤簾隱繡櫳五侯高宴罷小嚼試春風

詠史四首

少卿隲家聲次律乃喪師功名既頓踣志節徒恢奇子  
長與子美感激爲歔歔生平論知心葑菲貴莫遺眾口  
多哢哢身斥名亦隨英俊良可惜豈曰顧恩私虞卿捐  
相印人固未易知

邁會各汙隆秉心或顯晦莫以織者進笑彼耕者退成  
敗非偶然功名豈意外懷英固委蛇曲逆亦聾聵喋喋  
口舌爭安知彼所貴

信陵飲醕酒少伯泛扁舟名高適爲累功大不易酬古  
來豪傑士積威成愆尤壯心難自抑托物慰沈浮纖草  
無高柯濁涇無清流事勢非終窮忽乃爲身謀咄哉曠

達子徒爲名教羞

愛者日以親憎者日以疎親疎非有定愛憎情實殊糞壤充佩幃腐鼠嚇鷁雛公孫胙平津董相淪江都仙翮旣遭鍛幽芳亦見鋤寸心莫識察所抱徒區區

題沈謙之五丈竹翠溪堂稿

瘦骨珊珊稱五銖短檠無燄夜吟孤才人多抱春風怨若爲千秋弔小數

贈芝山師

老衲須眉古幽居歲月深一龕依佛火半偈息塵心澗冷雲隨蓋山空雪滿琴宅年方外社重此問東林

雪

來是無言去絕踪愁雲冷吹定相逢篝溫靈粟含春淺  
螭裏紅冰制淚濃粘雨好隨香作屑廣寒台伴玉爲容  
千年淪謫歸塵世骨化形銷結願重

胥石詩存卷一

胥石詩存卷二

歸安吳蘭庭胥石子

北行

我舟已起柁我僕已束裝慷慨出門去遊子志四方四  
方雖可懷曰予有高堂臨別囑再三兼以淚滂滂此去  
幾時歸切莫鬪身强方春寒未消淒淒多風霜況復凌  
朔地無乃薄衣裳太岱何巍巍河之水湯湯經過悉險  
絕徒侶各傍徨我行不女隨心常在女旁此行愼所適  
當念倚門望異土縱云樂何如還故鄉再拜謹受命感  
茲摧心腸男兒既長大無以効顯揚驅馳徒未已反令  
居者傷載詠尸喪篇三復春暉章人生非木石寢門安

可忘

吳大帝祠

大口方頤狀可猜生兒誰不羨文臺直教鼻祖開南國  
未必長江限霸才鐵鎖已隨流水逝石城空想暮雲堆  
黃旗紫蓋無消息祠宇荒涼闕綠苔

登金山

翠巘明朝陽卓立何玲瓏探勝忘涉險攝衣叩琳宮轟  
轟窄堵波縣梯躡晴虹欄檻俛倒景雙袖扶高空誰將  
一卷石奠此狂瀾中窈窕芙蓉花根蟠老蛟龍濤聲萬  
萬古逆折仍朝宗海門候潮汐但覺一氣通奇觀此第  
一豁達開心胸狂吟鼓枻去五兩趁南風



揚州

便擬春常住相看魂欲銷  
晴煙融碧樹小雨漲紅潮  
燈火揚州路笙歌廿四橋  
玉鉤淒豔處環珮問嬌嬈

平山堂

名賢遺構壓晴嵐遊客經過偶駐驂  
畢竟故鄉山色好憑闌重與望江南

露筋祠

露筋有祠界淮揚或云謠自鹿筋梁  
二說是非不足辨存其傳者爲民坊  
夫人貞素由天性路遇饑蚊如飛蝗  
羞持此身求寄宿貞名常在身則亡  
生人立身有大節堅如金石凜秋霜  
貶損行權非可訓害經破義由公羊

俗儒曲說人藉口  
洪涇入世隨低昂  
利害當前軀命重  
枉直尋尺煩稱量  
一朝失足百行隳  
末路難贖空自傷  
夫人於此誠卓絕  
曷不萬古流芬芳  
孤舟如葉泊祠下  
湖煙湖水青茫茫  
瑤堦無塵蕙帳冷  
靈風颯颯生虛廊  
手擷溪毛奠桂醕  
玉容寂寞疑新妝

宿遷東關遇劉東日

不盡關河路長亭  
復短亭春旗絲雨潤  
水市曉風腥詞賦  
小山桂舟航大海  
萍相逢聊一笑愁絕  
又分形

彭水口

番揭孰肩荷鏤插孰手操  
紛紛如螻蟻來往無昏朝  
云充公家役河淺行舟膠  
以茲事疏濬辛苦遭鞭敲  
不見

兩岸閒堆沙比山高余舟亦就泊曠步憩林皋有碑字  
可讀源委析秋毫彭水經嶧縣碎沙雜奔濤填淤屢見  
告居民多鬱陶徙沛非水性嫁禍由强豪至今此地民  
每歲任其勞歎息世情薄利已愛一毛所恨水無靈變  
遷隨所遭唯我又何求整楫待滔滔

仲家淺

廢圃漸漸長麥苗昔賢祠廟歎蕭條永嘉議禮殊無狀  
從祀差能黜伯寮

濟甯杜文貞公祠

屈子行吟後栖栖見此翁百年雙鬢短千古一詩窮松  
竹安閒室蘋蘩菲薄衷南池清徹底應與鑒孤忠

行人

野草碧於煙  
午日紅如赭  
行人憩古祠  
繫馬垂楊下

東阿南關外荒臺相傳爲管氏三歸臺也

層臺遺址是耶非  
佐伯高才天下稀  
卻喜吾公多內寵  
微臣聊復備三歸

陳思王祠

位列東藩忝懿親  
明時禁錮漫傷神  
五官自有相思枕  
卻與君王使感甄

園樹

園樹陰初布  
池荷香不收  
薄涼先近水  
疏雨忽疑秋  
入世方桃梗  
依人只蒨緱  
可堪牢落意  
獨對小庭幽

贈董虎田

憶余初識君乃在垂髫時君亦正年少翩翩負不羈東  
序共淹留讌笑相追隨敢謂忘年交頗喜得師資今夕  
復何夕執手各驚疑別來二十載物態紛遷移風塵鏖  
盛顏感舊心愴而同時幾輩人耿耿燭須臾存者如晨  
星歿者爲枯飢浮生能幾何擾擾竟奚爲旅舍當新晴  
接席坐虛墀好月滌暑氣孤花明秋姿彼我幸無事一  
尊聊重持身世如浮萍聚散安可知

由天津入都憩桃花口有於旅壁題詩者曰紅粉飄  
流懷舊恩深燈占袖話黃昏明朝又作天涯別殘夢  
依依月到門因書其後

禪榻茶煙淨客魂風懷左右不須論無端又過桃花口  
卻向青衫檢淚痕

河西務

茅店拋斷夢結束趁征鞍迹賤情易昵同隊如周親高  
宇煙漠漠廣野沙漫漫卻憐半規月已挂長林端透遲  
潞河畔水風生微寒萬象森欲動內顧形影單望中數  
騎來聞聲識故人近前各下馬藉草敘寒溫代馬嘶北  
風越禽翔南雲天末有行役彼此均苦辛

新燕和金質夫先生

烏衣舊事問梁陳回首空餘夢裏身幾度相依曾惜別  
適來此地又逢春輕紅欲暈花光潤淺碧初勻草色新

苦憶江南風景好，眼穿應有卷簾人。

古歌雜擬三首

何用問遺歡，明鏡揚州銅。願歡時一照，見歡便見儂。  
歡則負儂詞，窮多遁枝頭。百舌有言不信。

歡意不在儂，儂恨無時休。雕龍鐵作項，使盡機巧不轉頭。

擬青青水中蒲二首

青青水中蒲，傍有雙鴛央。戢翼復交頸，願言永相當。  
青青水中蒲，葉葉相參差。人心非我心，彼此不可知。

送人之蒲州二首

少住爲佳耳，恩恩又別離。天涯同作客，後會杳難期。暮

雨桃花洞春波鴨子池奚囊應徧歷慰我寄新詞  
別離何足歎此去劇飛騰四輔聯肱背三河重股肱洪  
流轟地軸秀色矗風陵鵲雀高樓在登臨感廢興

藤花行

有序

留京師寓宣武門外之崇興寺街其右卽先大夫  
宦銓舊時故邸向有古藤一株榦老蔭密具離奇葱  
鬱之致花時每嬉遊其下日夕不厭今其宅已數易  
主而藤樹亦翦焉摧喪非復昔時生意因思十數年  
來世情遷改先大夫旣歛骨青山而蘭庭以孤露  
之身重尋舊蹟感榮落之不常撫年光之易邁殊不  
覺涕泗之交頤也遂次其語爲藤花行



憶年十一走京師趨庭始聞詩與禮一堂三世何融融  
采衣拜舞侑浮蟻庭中藤樹孰手植根株屈曲葉巖巖  
當春花時開爛漫蜂蝶徘徊顏色喜絳闕彤雲引香車  
瑤妃笑墮玲瓏珥恣賞紛紛悉豪俊馬廐豐臺敢輕擬  
余時日夕暢嬉遊花下坐臥移榻几有時上樹作猿猱  
手挽繁枝攀落蕊此景不逢樂不再十餘年來轉瞬裏  
重經門巷轉凄然訪問都無舊鄰里風塵刺促意氣盡  
昔遊如夢那堪紀孤墳三尺隔南天寒食無人薙荆杞  
洪河滔滔江水深夢魂來往無窮已藤花藤花亦可憐  
生意婆娑非昔比世事變遷誰復論人何以堪樹如此  
攀條躑躅不忍去杯酒一澆花樹底花乎有知應歎息

依稀識此垂髫子  
吞聲爲賦藤花行  
回首茫茫清淚泚  
天津留題查氏園亭二首

春園物態正當時  
好向東風把一卮  
畢竟名花誰管領  
等閒開徧最高枝

溪山好處是農家  
柳岸曾嘶白鼻騮  
今日尋春經此地  
攀條無語綠陰斜

南望月夜聞笛卻寄雲溪

風月淒清倚柁樓  
誰家短笛作涼州  
歸心已逐南征水  
更有離懷寄北流

對月

迢迢白玉京  
五雲高崔巍  
何來下界諸侯妻  
吞藥騰身

瓊璫臺閒情耿耿不可磨散作清光照九垓玉兔兮皎  
皎銀蟾兮噫噫東沼西冥萬萬古撫時感事恨難裁攬  
衣沈吟申繾綣陰晴圓缺每相猜倘教長似三五盈不  
知更多幾許愁人對之而徘徊乃知天公頗亦老厭事  
故遣陰宮往往局不開此情未有極此理良可推霞帔  
霓裳自徜徉桂影婆娑花滿懷青虬啟塗鸞隨車風露  
淒清歸去來回頭凝睇悵無言九點齊煙海一杯嗟爾  
蜉蝣寄天地如何俛仰多悲哀

濟甯題太白樓

太白芒寒失酒人高樓終古壓城闌長安不少憐才者  
具眼還推賀季真

旅泊

旅泊聊窮目村墟景物幽  
麥場風引雉荷浦雨隨鷗  
故土千山夢天涯一葉舟  
支離慚野叟邀我話綢繆

舟行有述

舟行滕浦間中流若溟渤  
晶晶一泓開浩浩兩崖失翹  
首村落稀縱目天宇闊成樓  
多縹緲雉堞露兀兀官柳  
出青梢菰菱無以別吁嗟乎  
此地豈無人居室飄蕩那可  
論想復成魚鼈扁舟者誰子  
煙濤屢出沒得魚呼客  
賣生理何微末昨行逢大舸  
云是使持節行縣勘災傷  
開倉議賑恤應有無已恩逮  
爾未死骨此事竟如何撫  
舷意蕭瑟

清口

閒關走千里襍被載扁舟纔越洪河險便到淮水頭曠  
望極浩渺輟棹更夷猶四瀆分兩戒五行契九疇雄長  
各一方有如風馬牛河伯肆不靖怒氣排山邱三加吞  
濟瀆蠶食方未休進尺無退寸浸淫踰徐州沈瀟及沂  
睢泗上十二侯向俱相率從於淮祠春秋一旦悉見奪  
淮亦帖耳柔清口鍵內外一綫通咽喉淮弱河益強遏  
淮能倒流開門或揖盜併勢趨邗溝高堰雖鉅防捍禦  
安能周築薛滕甚恐吾爲岷江憂

淮南

秋水騰高浪連城障一隄劇憐南國賊反覺女牆低御

史乘驄馬天書降紫泥不知拜命後何以活災黎

渡江

十幅風帆挂夕陰洪流浩浩著孤吟地當淮海通潮汐  
山涌金焦自古今兩戒元憑江一帶六朝空有鎖千尋  
卽今北府精兵處笳鼓依然雜暮砧

伍子胥祠

歌舞方酣霸氣衰蛾眉有力辨鴟夷同袍孫武元無恙  
伏劍偏教謝寵姬

天聖寺壁觀管夫人畫竹

夫人作配趙王孫人間嘉耦古無倫閨闈雕華徵逸思  
筆墨靈氣輝千春興酣素壁寫叢竹梵剎一掃成淇澳

風枝雨葉忽紛披，龍象歡喜蕭娥哭。此時王孫大都來，  
錦袍魚軒共徘徊。睹此妙蹟應歎絕，逡巡縮手心顏開。  
世閱人兮人閱世，鷗波蓮墅誰能記。獨尋古寺尚巋然，  
殿角依稀留款識。嫋嫋千竿與萬竿，鐵鉤剝蝕土花斑。  
神物往來閱春院，翠袖想象生微寒。東京剩得宣和譜，  
半壁東南折天柱。降表簽名有內人，畫本蘭花無尺土。  
是區區者安足論，眼看滄海有揚塵。藝事流傳環堵在，  
雨淋日炙空悲辛。君不見稽山遺民再拜處，至今人弔  
冬青樹。

月

深憐明月好，伴我上層樓。地迴宜清夜，人閒值素秋。玉

箏風韻滿金掌露華浮何事迷閨闔青冥記夢遊

范少伯

爲上將爲名士一舸風流載西子蛾眉此日亦逃名功  
成拂袖入煙水越王自有金在鎔一以鑄范蠡一鑄屬  
盧賜文大夫

虬髯客

虬髯客眞英雄掀髯一笑生長風三尺劍作孤蛟吼龍  
爭虎鬪在胸中道人弈罷顏不快世界此非公世界虬  
須公子襦裘來眞氣驚人露光怪天下豪傑本無主餘  
子碌碌安足數騎馬出門走四海休戀赤縣區區一撮  
土汾陽橋酒家樓揮手謝故人賀我東南得意秋誰向



中原覓朱紫三原李郎枉男子

絕句二首

夢到增城路自迷丹霞樓閣各東西  
瑤池元有重來約只是難尋八馬蹄

好寄相思玳瑁簪碧桃花下記停驂  
芳春有盡思無盡身是吳都八繭蠶

偶過孺和堂見盆池白蘋尙餘一花  
清霜零矣女何爲哉慨然成詠

一鉢是生涯孤根尙吐葩未須悲冷澹  
且復惜年華北渚秋如許江南日又斜  
伊人仍宛在采采賦蒼葭

雀飛多

雀飛多啄我場中粟田家終歲長苦飢安得有餘充爾  
腹莫言絺帳薄猶得拒微寒莫言湖水渾能令井水寬  
飛以南飛以北日暮野田畏彈射畏彈射謀生亦可憐  
泣語巢中雛爾生何不逢康年

西湖

五國城頭夜月哀兩河千里沒蒿萊西湖一片清涼地  
先遣蘄王遊賞來

食櫻桃

小院寂寂綠陰鎖午餘睡起卷書坐門前剝啄有客至  
爲憐消渴致珍異一見喜劇眼倍明傾筐盡載殷勤意  
祝融昨夜失牟尼冰夷敲碎珊瑚枝惡湫風雨赤虬死

強晴剝出光陸離鮫人墮淚成血點走盤洽洽貫朱絲  
名品天生誰比附瓊瑤愧詠風人句露滴星繁何處尋  
知有幽禽空遶樹

祖德詩 有序

乾隆二十五年月日江南潁州府太和縣貢士徐振  
烈等以賢侯之遺澤未彰乞廣 皇仁以光祀典事  
籲于府若縣其略曰前明太和縣知縣歸安吳公諱  
世濟者於崇禎七年涖太和任當下車之伊始值流  
寇之方張烽燧遍于江淮蹂躪兼乎廬鳳沉細陽本  
彈丸之地曾無蚍蜉蟻子之援而長官矢守土之忱  
不忍猿鶴蟲沙之化拮据以籌軍實慷慨而誓國人

投醪持卒伍之心飛礮碎渠魁之首以一旅一成而  
卻敵乃三戰三捷以奏功從此白馬青絲帽金城之  
鞏固黃雞綠酒幸葦屋之安全在當日鋒鏑倉皇有  
死之心無生之氣而今者滄桑遷改雖死之日猶生  
之年俎豆弗忘已食春秋之美報鼎鐘可紀宜崇廟  
貌之宏規伏乞詳勘具題建祠特祀則輿情允協惠  
澤常新矣詞既上大官如所請爰規地庀材版築者  
効功斧削者施巧不逾時而祠告成作公之主祀焉  
於是距公之沒已九十六年其去宰太和時則百二  
十六年矣公之來孫蘭庭乃肅拜言曰古之良吏有  
去而見思者矣然去之既久則或相與忘之方吾

先祖之宰太和也以絕援之城邊長驅之寇少一搖足卽閭井爲墟自非奮不顧命義勇之氣有以率勵乎人心夫安能以戰則克以守則固晏然奠斯民于衽席也鄉使當此之時彼荷天下之重任爲總理若督師者胥視此之有爲有守則有明之天下亦何至拱手成敗任其魚爛鹿駭一壞而不可收拾哉而乃權姦蒙蔽功罪不審竭蹶圖存者反授散秩以去而流氛巨猾竟滔天而莫爲之所蓋誰秉國成卒勞百姓人事旣失而天命隨之矣 聖朝咸與維新諸神受紀褒忠旌淑靡閒幽遐而勝國孤臣且得於形銷魄化之餘秩馨香于殷祀豈非曠典昭垂洵古今所

罕覲而功澤在人更不容以異世氓也耶作詩紀之

凡八章章十二句

有明末造權綱下移虐用下民起而相仇袒褐一呼盜  
兵潢池旣始秦豫旣躪襄隨堅城旣傾名都亦隳縱橫  
莫當君臣齎咨於顯吾祖中都作宰拊循未替賊眾  
萃止爰敬爰戒邦人多士吾奉朝命畀以百里義共存  
亡身家何有願從豪杰嬰城効死邦人多士聞言髮豎  
愚賤何知轉相告語有公如此我忍相負誰非臣子誰  
家天下植節秉義公實命女相率登陴用作干櫓有雲  
逢逢維賊獷弧有雪皚皚維賊戈受孰赤而火孰白而  
荼昇彼雲梯薄我闔閭渺焉書生手礫其渠颿馳霆擊

餘眾駭遁吾祖申戒吾憂方大賊怒未已不可以怠  
或峙其糧或簡其械賊果復來其氣甚厲志在必克旋  
復摧敗至再至三甲抗兵倣賊既遁逃上下相慶農憩  
于疇士休于庠謂公之賜令我更生願公壽考永綏此  
邦庸知遭忌遽返耕桑綸巾白髮幽獨神傷聖朝受  
命九圍是式奠我生民蒙休嗣服唯此良臣民懷其德  
百年既往歌思猶昔生有餘榮死有餘威誌以勿忘曷  
其有極奕奕新祠既奠且輪前榮後寢几筵具陳帷帳  
蕭穆神棲其閒吏民以時爭奠蘋蘩於顯吾祖食報  
長縣是用作詩勒諸貞珉

忽忽

忽忽歲邁盡微吟有所思寒蟬空自苦芳草不逢時我  
愛陶元亮誰爲送一卮丁甯煩老圃相報菊花期

峴山有感因題明霞墳

東風無處不霑裳第一休過十錦塘今日冷煙疎雨裏  
落花猶自泣殘妝

燈

短檠偏私我相依影與形笙歌歸別院風雨到疎櫺一  
夜頭如雪三秋夢未醒須知心事在吐餞照青萍

古意

南國有佳人獨處下重幃自矜容顏殊願景屢徘徊芭  
蕉心不展桃李下成蹊常恐一出身誤隨輕薄兒以茲



抱幽嘿不恨無良媒蹉跎歲月晚嘉運何時諧昔爲泣  
露花今爲傲霜枝物情貴苟得眾女嫉蛾眉兩美無兩  
傷其如知者稀挽我舊時髻著我舊時衣毋甯終棄擲  
禮防申自持肯學青樓倡妝束求入時

胥石詩存卷二

胥石詩存卷三

歸安吳蘭庭胥石子

丹陽除夕

水驛山程路渺茫  
奔馳空自惜流光  
纔過今夕成新歲  
未越長江已異鄉  
蘭炬生花仍遞淚  
鵲絃欲語更迴腸  
愁懷相對無排遣  
野漏沈沈幕有霜

元日徐偃王廟書壁

履端時序紀青陽  
羈客行歌黯自傷  
野水蒼茫寒霧裏  
叢祠攜酒奠徐王

渡江

理楫當清夜  
寒江氣象豪  
涵空星極迥  
拍岸凍痕高  
土

卷之三  
俗方區別鄉心正鬱陶老親不識路有夢越風濤

涉河

征騎蹋河隄兀兀方北首躊躇無津梁按轡不敢驟河  
流寒徹骨重陰接爲構高浪排空來僵立忽不仆外强  
腹亦堅磊砢露乳竇鏘疑巧匠皴染類眾皴遂令越  
波濤有如陟巖岫遂隊互來往轟轟喧白晝壯哉馮夷  
宮乃與萬蹄鬪性命寄空虛呼吸變氣候大力固能負  
長恃恐亦謬登岸心猶惇默念敢多又酸嘶不能言巖  
風襲懷袖

驅車

謹言岐路各西東卻歎同途轍不同伊日近鄉余日遠

驅車何事逐征鴻

王家營

朔風吼長林天淡寒雲白地界猶江南客路已河北凌  
晨駕言邁徒御慘無色坡陀莽回互漫漫無行迹大川  
亘吾前欲渡堅冰塞雪花況橫飛瞥眼便逾尺蹇驂凍  
且僵瑟縮屢辟易居民出土牛歡喜手加額謂此豐年  
祥頗復宜牟麥善禱具微忱其如困行役造物非偏私  
因人成怨德村墟有濁醪聊復慰倦客

邳州早行

征鐸郎當客舉鞭淒淒最是曉霜天扁舟好憶毘陵道  
寒雨連宵枕手眠

嶧縣道中

晨雞號東廂行人車載脂豈不懷息偃我生有驅馳日  
出寒未銷堅冰著須髭因思白髮親念我遠別離清旦  
坐默默淚下如綆縻但言行者苦莫悉居者悲旣昧遠  
遊戒敢忘丁甯詞歸裝願趣辦秋碁毋愆期

涉泗

北風獵獵獵嘯飢鷹濁酒衝寒力不勝雪片模糊平野闊  
征車碾過一河冰

雪後望穀城山有作

積雪峩峩峴未流穀城山色映清眸平生想像青如黛  
不道相逢已白頭

濟甯題孫氏園

自來此地方旬日卻到孫園已六回好景從知隨處有  
客懷能得幾時開梅扶老態猶含夢花釀柔情未破菱  
準待春光無一欠擎甌挈榼上平臺

沛縣雜詩二首

不盡興衰迹難將理數推耨鉏開盛漢刀筆冠羣材暴  
氣火三月忍心羹一杯阮生多白眼廣武有餘哀  
劉郎眞落魄老去忽歌風豪氣銷磨盡歡情賞讌同龍  
蛇迷大澤雞犬散新豐擬上通天表淒涼問沛宮

徐州雜詩二首

天際層陰豁登樓眺遠空渾流吞汴泗窮老足英雄饑

啄昏鷗雪寒嘶瘦馬風當時爭戰地把酒歎孤蓬  
戲馬留遺蹟敖遊亦壯哉英雄無尺土今古擅高臺野  
日明僧塢山雲潤客杯更傳良宴會幕府盡鄒枚

千里馬行

千里之馬不常有千金買骨聞涓人房星降精光奕奕  
華軒突兀見騏驎漢家節使通身毒撫髀雄心思驥足  
貳師鐵騎度燉煌別觀春風栽苜蓿絕域偏蒙特達知  
天閑當御爭權奇絲韁錦幃空零落歎息而今愛者誰  
天心眷眷生神物臨陳成功龍戰血伏櫪徒教死便休  
何如不付殊尤質窮陰慘慘雜風沙山石峻嶒道里賒  
世上安知無伯樂莫辭委頓服鹽車



作客

作客悲生事經春念物華如何逢禁火纔始見梅花芒  
屐尋芳路青帘貰酒家風塵徒擾擾歸夢遶天涯

夏鎮寒食

此處逢寒食郊原日未曛白楊聞痛哭杯酒奠孤墳身  
世飛蓬遠關河異地分傷心邱隴在蔓草亘長雲

孟嘗君祠

好客虛名亦可羞卻殘宗國快私讐雞鳴狗盜營三窟  
何似龍文縱火牛

滕文公祠

千古兩英雄滕文周世宗惜哉天不相蔑以究成功一

患國勢蹙一苦壽命終遂令賁志歿悠悠無終窮我來  
遊滕城齊肅謁祠宮撫事中默感搔首仰蒼穹當時多  
大國有主皆昏庸仁義置罔聞無由返郅隆閒才產叢  
爾發憤難爲雄井田與學校有志未獲從亞聖徒皇皇  
於此酬微衷吾意罪眞宰位置何夢夢將毋旣未悔胡  
乃生不逢自古有此恨蕭條來悲風

嶧山

驅馳鄒魯閒登陟亦云屢嶧山特有名客途沉適遇繫  
馬梅花林香雪濕芒屨循趾方勃窣其巔心已踞轉側  
得微逕崖石彌回互嬴秦有篆刻攢斥孰呵護典刑今  
僅存遷徙失故步惜哉希世珍因人成眾惡物理安可

常慨息動遐慕

牢落

牢落窮晨暮微吟強倚闌離懷猜夢惡孤館覺春殘馬  
服書空讀牛衣淚未乾長安愁北望迢遞隔雲端

觀走馬妓歌

霜蹄踏鐵拳毛騮一飲玉兮再飲沙據鞍伋伋誇身手  
美人顏面如桃花美人家本邯鄲住折腰學得輕盈步  
流寓今來古濟州朱簾翠箔指高樓廣場中開臨直道  
觀者千人齊側腦結束裙裾顧影看窈娘上馬弓鞋小  
緩轡方矜行步工垂鞭但覺風神好忽盤遠勢離哉翻  
風雲奔馳交往還燕子身材舞翠盤轉側變幻須臾閒

有時蹶然立鼈背出沒波浪急有時帖然臥醉者神全  
車不墮有時藏身金鐙旁有時倒植若垂楊有時遶出  
馬腹下千秋運轉相低昂有時宅馬交面過騰身易位  
各超驥一落無端千丈強雙鬟不動神揚揚我聞山東  
與河北昔多響馬稱豪客飛空一騎攬紅塵深林白日  
聞鳴鏑數十年來教澤深畏途已成安樂國技勇流傳  
尙絕倫須眉往往慚巾幗柳花飛雪春濛濛主人開尊  
虎魄紅一物已足罄千鍾况茲絕藝兼雄風不見漢家  
留侯似好女馬上成功佐赤龍美人駿馬辭重瞳

泉林寺

問源窮泗水覽勝歷媯亭樹翳無全日泉澄有亂星閒

房聞梵唄古壁照仙靈獨宿宜清夜倏然塵夢醒

少昊陵

石紐流傳七字完全天陵墓儼層壇豔歌不信開璇室  
夷裔偏能志烏官山色當門朝旭麗松聲滿院夕陰寒  
禮臣聞有新條奏碧瓦加隆改舊觀

乾隆二十七年 皇帝南巡守旣返至於曲阜乃  
以四月十八日謁 至聖先師林廟有加禮時草  
莽臣 蘭庭 適在曲阜幸得從彼都人士之後仰睹  
大典甚盛遇也恭賦六韻

前聖心源接 今王祀事同翠旂方向北清蹕又徂東  
蠲吉瞻林廟明禋慎始終赤符隨秘殿金奏近行宮典

禮殊優渥精誠自感通此時占氣象華蓋五雲中

周公廟

廣城重櫓廟制崇宮縣大備稱元功首邱遺魄依文考  
開國詒謀撻魯公九譯越裳瞻袞繡千秋周禮屬龜蒙  
從茲道統分窮達後聖栖栖夢寐通

書魯共王傳

生長深宮王列城何妨音樂特關情河間大雅求遺籍  
可許曾聞琴瑟聲

寄虛益

低頭蛩駟兩相憐意氣飛揚孰後先被酒並尋盤馬地  
乞花同泛釣魚船團團明月人千里采采華芝夢十年

書劍羈栖更何道秋風遲爾祖生鞭

船行

露坐情無極船行捷有神星光寒墮水樹影遠隨人鳴咽風中笛飄揚夢裏身潘郎秋易感怪得鬢毛新

雜詠三首

遠山翠色照彈琴溝水東西寄恨深泉下故人成永訣當時不解白頭吟

自是紅顏福不全二喬夫壻孰長年春風借與銅臺住也向西陵望墓田

檀奴芳色老河陽青瑣偏誰沾異香好向公閭夸貴胄簾箱尚有少年郎

舟行書所見

隄岸多防土村墟有戍樓形規環郭堞名襲送寒牛風  
景詣曾徧舟杭役未休家山何處是歎息此淹留

東昌府

危疆遏敵計非疎狙擊依然中副車大啟城門呼萬歲  
金川偏學鐵尙書

天河

一水殊清淺曾揚幾度塵不教天共碧可許月如銀永  
夜空留影新秋好問津別離無限思應有翠蛾嚬

故潮縣

直沽抵京師計程三百里水陸幾經過信宿便至止今



來附漕艘程期排雁齒況值秋漲初白河水瀾瀾衝波  
乃逆上牽挽勞千指朝朝復暮暮相去僅逾咫驅車欲  
言邁四牡轡耳耳夷庚成橫流浩渺無行軌瀟瀟風雨  
惡昏默坐篷底順逆固有時遲速安可擬持杯手斟酌  
曠然得妙理

### 夜夢

羈客逕歸家登堂見老母母喜兒歸來雪涕執兒手問  
兒幾時歸竭來無恙不身上何單薄袖短乃露肘手取  
桁上衣覆之輕且厚秋雨夜沈沈狂飈屢怒吼忽然吹  
夢覺燈影耿虛闕起坐淚滂沱感念離母久夢中語分  
明顏面驚衰朽生平七尺軀衣食空奔走高堂眼欲穿

倚閭卯至酉富貴安可希功名復何有誓當決歸計  
廢門奉髓脩安能勞夢魂鬱紆更回首

盧溝橋

騎驢出京國水次當斜曛親友送我行執手路欲分  
丈夫會有別安能戀其羣所悲垂翅翼無由致風雲  
去去歷燕冀依依涉河汾依人方旅食誰爲平原君  
務得計徒拙抱素名乃芬遇合終有時通塞何足云  
搖鞭謝關吏愼莫笑終軍

易水

一劍動行色秋風柰爾何此時渡易水無語弔荆軻  
燕市酒人去誰憐慷慨歌枕鞍聊快意歸夢碧山阿

眞定府

由來河北賊未見出羣雄奕葉威權替諸軍節制通神  
尖當落日蒲澤正秋風指點經行處空王有故宮

渡滹沱

吳儂不習水鞍馬夸趨捷客程踰鎮定濟盈賦匏葉馬  
固分龍性于水少相狎余藉以自壯策之乃徑涉影動  
雲詭委骨寒沙戢奮半渡水漸深衣裝濺欲濕翹足踞  
馬背俛睇勢岌岌奔湍若排牆瞬息走百疊截流貫其  
中銳進疑倒壓目眩不敢視恟怳氣已懾咄咄多艱虞  
坎險愁出入小旻有卒章三復願肄業

望恆山

神皋勞騁望北岳著巡方豈有一拳石飛來上曲陽渾  
源移祀典元玉秘祥光曾讀崧高疏遵循歷漢唐

井陘口

防禦居然鐵不如土門失險惜陳餘淮陰何必稱儒將  
學道能師李左車

柏井驛

天風吹縹緲徑狹山百折我行秋方中寒氣已凜冽兀  
兀有虛警短夢作復輟初日出東方人馬同欣悅不辭  
登陟勞屢見土風別山要亘疎煙居人乃窟室戴履俱  
后土一竇洩天日蟄蟲坏其戶動物宜羸物古民旣陶  
復隙地亦甌脫聚族得栖止此焉生且活朴野無物累

愧我身世拙回首彌忡忡窮途畏顛蹶

太原府

客子生計拙依人走退方相逢無舊識忽忽氣不揚昨  
行抵太原風景鬱蒼蒼主人故并州茲焉其故鄉入室  
相慰藉妻孥生輝光我亦喜稅駕拂拭征衣裳空堂奉  
安居晚餐拏黃梁塵勞幸暫息稍覺耳目強巖城接邊  
塞肅肅飛早霜朝來出門望萬木摧平岡風颺忽四起  
驚沙連雲黃悵然昧所適卻立徒茫茫

妒女祠

并州妒女祠舊祀介推妹俗說每荒唐頗訝涉神怪妒  
爲人惡德鄰里所詬誶生旣不如死死又安足貴柰何

致崇奉牲醴紛禱賽廟像特儼然過客多肅戒環瑱撤  
不御姬姜亦蕉萃唯神苟有知嘿念應內悔汝家有世  
德偕隱死無懟介山縣上田仰止高風在汝獨蒙惡名  
覲焉不自愛豈不墮家聲詒厥母兄媿作詩語未竟慘  
慘天晝晦霹靂起座隅風雨忽交會固疑神護短作此  
大狡獪果爾真冥頑惡始莫晚蓋

趙襄子祠

翟犬開疆踵射熊晉陽柱質發餘銅仇王貝帶誇騎射  
咄咄雄心有祖風

清源縣東湖

灣環當縣郭淼渺得迴塘及此成佳賞幽然見故鄉枯

荷方急雨疎柳已斜陽誰共扁舟興臨流意不忘

題桐樹

涼思到天涯碧樹秋蕭灑夜半疎雨聲人臥小窗下

得寅賓叔楚中書

嗟君近況復如何雙鯉傳來慰寤歌千里客經三載久  
一門人覺四方多晉祠寒雨蘋仍綠鄂渚秋風水自波  
彼此羈栖各回首閒情豪氣半銷磨

發太谷留別孟雅周

異地成棲泊因君得勝遊平原十日飲老杜一生愁班  
馬侵晨發飛鴻著處留宅時容念我掃榻待南州

祁縣口占

骨言三  
貌取分明失賈辛同車脈脈奉清塵如皋射雉尋常事  
且喜憐才有美人

介休縣九日

稻梁計拙雁嗷嗷顧我相逢敢告勞愁鬢欲星方作客  
長途無日不登高介山荒聚餘枯樹潞國空祠見野蒿  
臨眺躊躇心事在西風節物正蕭騷

韓信嶺

一逕走峻坂崖壁若環衛行行漸幽默如入永巷內日  
御厯線天見午不見未亂山渺木石蠢蠢唯積塊堆阜  
忽俯瞰突兀壓我背脈疎質已離砉然恐其墜勢險比  
巖牆疾驅思縱轡卻怪繞馬首抗行斷復綴保無或偶



然適與旤機會頗聞漢韓侯奮跡致高位一蹶中危法  
乃爲兒女賣詎伊非英豪良由昧進退卽今弔荒塚行  
客發深慨凜凜抱微軀羈孤彌自貴

國士橋

揭來趙晉郊弔古傷豫子相傳擊衣處有橋名國士女  
爲悅已容士爲知己死顧影何蕭蕭匹馬秋風裏

洪洞縣韓忠定公墓

一封奏疏涕沾巾去國倉皇共潔身只有茶陵承顧命  
端居黃閣作文人

皋陶墓

祠宇巍巍當墓門庭堅不祀不須論德明他日追尊後

應屈元元作耳孫

望姑射山

馬頭瞻名山第見蒼翠堆不知照天池蓮花開未開石  
枰數圍棋妝樓臨鏡臺應有驂鸞人招我歸去來

聞喜縣裴晉公趙豐公祠

裴趙祠堂今尙存森然趨拜駐征轅大名輝映垂青史  
異代蕭條共里門雪夜功成都將相午橋身退樂林園  
詎知霜鬢方憂國箕尾芒寒把臂論

鹽池篇

中條蜿蜒趨太行穿崖百道泉湯湯瀦爲黑河繚周牆  
潤下作鹹德靈長地寶天成傲海王鹽池二月野浮陽

千畦齊開如築場溝塍錯比規以方請周四角從中央  
手挽長河挹天漿汀渚平杯俯混茫晴曦杲杲金烏翔  
好風南來生微涼斟酌元化凝晶光網緼交通品物章  
皚皚積雪兼飛霜慨自往者邁炎荒雨暘不時舞商羊  
姚暹名崇暴橫巫咸名河張七郎卓刀名俱隄防升高四

望歎汪洋額餘鹽地生菰蔣官吏束手徒旁皇女池指  
坑聊醫瘡味苦利薄難酬償幸今豐樂值時康一水盈  
盈波不揚收入倍稱野蓋藏算緡發引隨服箱金玉其  
車走富商盤屋翟君須眉蒼路村客舍連匡牀爲予諠  
諠道其詳歌風高臺琴琅琅阜民之財垂衣裳

解州謁

關聖大帝廟

廟有果親王  
所畫聖像

華夏威名遠尊崇世澤長冕旒昭物采俎豆肅烝嘗身  
已歸天上魂宜戀故鄉陰森疑禁籞結構得祠堂擎柱  
龍噓氣當軒柏耐霜桃園仍俗說大義作民坊尙想君  
臣契何如兄弟行畫圖展縹軸標識自宗潢生面開  
千古英風照八荒規模殊慘淡點染入微茫河水連天  
濁條山拔地蒼名區誰崛起正氣未銷亡遺恨唯炎祚  
垂聲擬素王卽今瞻廟貌虔惕永難忘

送人之安西幕府

古有從軍樂休言行路難異鄉仍送別遠道祝加餐鼓  
角當秋警風沙卷地寒輿圖大無外立馬想登壇

書家姊雪庭遺稿後

同氣僅三人一弟最穉齒姊則年相亞生小相依倚姊  
今不可作一棺已戢體空山無人邇夜雨草靡靡自姊  
長逝後縷細難陳指老親多白髮肌黑骨無髓中懷鬱  
不舒憊甚非昔比我之所自出一男三女子大者省人  
事小者方學禮卽如我無狀家居困生理有親不顧養  
燕趙屢轉徙姊應盡傷心淚落成鉛水秋館風淒淒孤  
燈墮冷蕊有懷莫告訴感念安能已辛酸撫遺編無由  
徹生死

關龍逢祠

金版方垂警鑢宮孰告猶憂時同五子死諫倡千秋祠  
廟松杉合牲牢秩數優如聞靈爽在劍珮每從遊

虞帝陵

有序

陵在安邑縣之鳴條村邑人有著辨刻石者力闢檀弓史記之謬夫南巡野死昔人蓋嘗議之然於此之爲舜陵自孟子一語而外則亦苦無確證也古人朽骨故老爭焉噫觀過知仁民有爭心其斯爲民之秉彝乎因賦此

帝德光華遠不遺斷斷此地說東夷南天望斷孤墳處何限傳疑是九疑

魏王豹故城

霸氣銷沈城闕荒當時推刃恨滎陽若非授意由隆準幸得封侯比什方擇主豈容工反覆罵奴已識薄心腸

可憐彭仲還同傳泣涕何由反故鄉

天末

天末方愁思憑闌一浩歌美人不可見吾意竟蹉跎月  
色當窗迴寒聲入夜多祇應舊遊地夢寐重經過

胥石詩存卷三



胥石詩存卷四

歸安吳蘭庭胥石子

夏縣司馬溫公祠

有園名獨樂大感在斯民  
枚卜驚強敵豐碑冠黨人  
武鄉心自醉東里愛猶新  
涑水何幽咽寒流亦愴神

曲沃道中

柳色侵肌綠桃花照眼紅  
異方驚物變久客覺途窮  
顏面風塵裏鄉園夢寐中  
春疇方力作吾媿荷鋤翁

寒食

輾轉歸無計蹉跎候屢遷  
飭簫寒食節絲雨杏花天  
風景非吾土羈愁似去年  
誰家澆麥飯有淚滴重泉

偶題

何處頻來往張園復郭園  
繁花依鬢影纖草護蹄痕  
國經年別乾坤故我存娛懷  
聊此地終想舊柴門

登臨晉城樓

琴劍隨身任轉蓬  
放懷且擬醉春風  
嗟峨甘棗堆濃綠  
浩瀚桃花滾亂紅  
大將十年亡賴賊  
男兒七尺可憐蟲  
宵來雷雨知何似  
須問龍門赤鯁公

王官谷弔司空表聖

弈棋世事問長安  
大節深惟出處難  
只有此中堪辟地  
谷名依舊著王官

送別

屈指人千里持杯酒半醺此時仍惜別當日悔逢君雜  
甸多芳樹遙天有斷雲故鄉歸便好愧我滯河汾

遣興三首

伯牙絕其絃終身不鼓琴斯人亦已沒千載誰知音茫  
茫撫急景悠悠抱寸心所以陳伯玉宣陽擲千金  
阮公不羈士涉世緣殊淺一醉天地小長嘯黃農遠舉  
國嫉若仇此身乃幸免窮途淚未乾看人仍白眼  
陟彼太行山石路多崎嶇嗟哉不可越不信有康衢爲  
我謝騏驥努力服鹽車此閒無孫陽日暮空躊躇

孤館

孤館秋初迴深杯手自拈微風搖碧樹涼月透疎簾徒

侶羞樊噲行藏卜鄭詹霜砧何處急一夜旅愁添

蒲州府

萬雉環城據要津山河表裏勢輪囷連岡東首趨恆碣  
濁浪中高界晉秦多設疑兵誠國士喧傳旆隊亦王人  
書生何限蒼茫思斜日酸風馬足塵

首陽

爲愛西山好清秋出角圭風塵一杯酒不敢奠夷齊

女媧陵

邃古誰傳奠九州風埏秀出峙高秋手搏黃土須與事  
死後青山只一杯

潼關

河流潼激忽東馳立馬巖城騁望時日麗三峰森劍戟  
雲開四扇護熊羆防關休學哥舒翰搏戰空憐孫督師  
此地屏藩天下險全秦從古繫安危

楊伯起墓

潼亭吟眺夕陽斜清白留貽志願賒才子可憐淪世德  
卻令比並到袁家

華山

青柯十八盤盤盤千尺餘境劃谷谿呀徑絕崖扶疎奇  
險得天縱闢此鴻濛居罡風御清氣飄飄吹衣裾紫鸞  
鳴啾啾拊翼爲前驅靈君紛來迎顏色俱敷愉指點青  
蓮華灼灼朝霞舒絳節排參差驂隨羣仙妹願言乞霞

珮綬已迴雲車水簾亘窈窕蒼龍凌高虛鐵鎖不可攀  
卻立空躊躇悵然謝玉女爲我揚清臚塵土方勞勞歎  
息靡所如

汾陽王故里

里閭人爭識汾陽蓋代勲奴才猶虎豹麾下各風雲明  
哲心彌苦奸諛勢正熏河山方再造不敢問邱墳

華州

川嶽縈回得上腴周京往事問司徒中興錫土分邦甸  
東徒稱名襲舊都繼世緇衣方授粲再傳縉葛遂張弧  
須知箕比當殷季商度何曾爲寄帑

途次偶成

數家成小聚一水得平疇識逕牛羊晚被原禾黍秋送  
迎緣路埃浮沈去聲致書郵誰念秦關客蕭蕭歎樊裘

故泉鳩里

趙虜無端入犬臺當年博望爲誰開臨江已觸蒼鷹怒  
待罪何曾得活來

故函谷關

襟帶桃林拱帝居山川氣數亦乘除武皇元有移關意  
不道樓船已上書

號略鎮

賂秦幾畀秦秦乃征河東東征實始此甯唯霸西戎

茅津渡

卷四  
蹇叔哭中壽爾拱冢上木秦伯哭孤實不德違蹇叔渡  
河焚船懾晉人封穀中尸濟茅津茅津渡頭風日曛雄  
圖耿耿縣高旻翦鶉首錫金策夢侍帝之側天帝歡樂  
鈞天張一醉無端畢六王此醉何時醒赭山鞭石任狂  
騁直待五星聚東井

傅巖

木葉蕭蕭沙澗枯重經傳險獨踟躕自從審象旁求後  
胥靡猶能入夢無

底柱三門歌

西域之水入中夏猛氣奮迅如奔馬連山排拶隨以趨  
底柱特其小小者兩峰矗峙河當中遙扼河流當其鋒



馮夷起舞河伯怒天風慘慘鞭羣龍洪濤乍訇撞萬鐘  
乾坤摧裂飛雷公終古昏曉留空濛屹然離立青芙蓉  
豁閭萬狀石齒齒鑿石落水水益駛穿崖通道僅三門  
其一爲人二神鬼須知人命特孤危生理幾希強半死  
我來觀此立斯須心撓目動魂驚呼險惡若此誠莫測  
沈思何必非夷途禍福無門隨所致人世風波何處無  
嗚呼人世風波何處無

太行山

誰鑿鴻濛竅巉巖直至今逕迂盤腹徧石古納蹄深澤  
潞風塵迴幽燕氣韻沈壯哉天下脊不負此登臨

投贈解州言素源明府二十韻

文學稱昭代東南擅一方開先容數典言氏實升堂公  
本昔賢裔占宜五世昌制科徵異等初政界巖疆百里  
鸞栖枳中牢雉雠桑絃歌敦雅化祖訓奉無忘去後思  
何武當時頌子康賢聲垂俎豆治效著循良厯試多盤  
錯殊遷牧解梁專城勞撫字分轄絕班行刺史威名重  
雄藩財賦强薰風宣悅豫鹽澤沛汪洋商裕蚩尤鹵氓  
甦織女襄脂膏曾不潤經術自生光宸眷垂優渥蒼  
生仰廟廊勦猷從大展藻鑑更非常身未參璣屐才殊  
媿錦囊澹臺公事少衛玠夙愁長何處題鸚鵡徒勞貰  
鸚鵡西河方學道玉斧借吳剛

龍門

萬古淪渤澤重源厯浩盪劍攢山巾岸箭激水爭門雷  
雨聲靈壯魚龍窟宅尊禹功從此遠疏鑿定乾坤

故汾陰縣

側聞多古意而我眺荒原落木連雲捲洪濤挾雨奔  
神徒寂寞寶氣自朝昏莫問秋來雁西風傷旅魂

河津

不是河津忽阻兵漢宮那得貯傾城美人莫笑初時約  
側室生兒兆大橫

巴陵周立人客于猗氏將歸矣枉道訪予于解州  
時予適往滎河留詩而去因成四韻寄之

夙慕周公子無由共舉樽況當驪在路復此鳳題門遠

帆瀟波闊寒煙郢樹昏到時應歲晏尺素幸相存

城西獨遊

山谷多風霜秋末氣先換林虛無剩籜陂荒有警翰杖  
策走近峒縱目得靜翫煙銷孤村迴日麗平沙粲道旁  
石磊磊擣菹列枯澗愛茲坐摩挲大聲忽雷扑回頭見  
奔泉俄頃已當面始知山下源冰薄迫午泮略約雙木  
橫喧豗一水灌雖無蛟龍蟠頗覺毛髮顛俯仰轉清寒  
沿迴餘眷戀浩歌晚歸來蒼茫感歲宴

客有遊邯鄲者賦贈

君到邯鄲擎酒杯爲余一弔古叢臺天生頗牧俱名將  
只有黃金愁郭開

送孫岳宗五丈靈櫬南還

孤燈耿素帷別屋多風雨古來皆有死悲君在羈旅奄  
然棄萬事冥漠歸黃土故鄉不可見道里修且阻骨肉  
成永訣存沒杳無主聞君屬纊時諄諄向僕語以我爲  
近親後事當付與詎知重閒闊奔赴不復覩一棺束古  
簾蕭蕭丹旆舉霰雪滿關山客路魂歸苦幽冥終負君  
祖道倍淒楚

觀鍾恕行作畫

白草茫茫霜野枯重窳促坐共圍爐知君胸有江南本  
割取秋山入畫圖

奉別家叔耕心運使二十二韻

倦翮無巧啣念絃有哀彈生平屬恩私長跪聊陳宣小  
子方弱齡有志在騰鶩磊落羣聖文研窮破拘牽心頗  
薄輩流錄錄如等閒自謂致青雲無怵宅人先荏苒二  
十載秋風鐵硯穿上策屢不收足則璞僅完長卿徒四  
壁王郎餘青瑣偃偃適四方送行爲辛酸夜雨涉河汾  
朔雪度燕山回頭望鄉國迢迢路三千慈闈登大耋菽  
水難爲歡去住兩無計岐路淚泣然吾宗父之執詔之  
坐席前謂曾與女父彼此甚周旋同榜情所敦況復譜  
系連飲食兼教誨盼陳蒙矜全乃知古義人不隨世態  
遷念今當遠別贈我繞朝鞭酬分非可期敢忘金玉言  
先業慎無荒努力及壯年

平陽府

冀方橫覽得雄封  
溢郭填城井里重  
風俗百年安朴陋  
關河中土控朝宗  
伊耆祠賁松雲采  
姑射山凝冰雪容  
畢竟巢由成獨善  
豐碑空復識高蹤

師曠墓

千古高懸炯炯眸  
寶符同此掩荒邱  
一從緱嶺昇仙去  
淚盡知音賦轡柔

趙城縣

策駿西巡萬里沙  
功成錫土世爭誇  
蜚廉稔惡偏餘慶  
贏得秦家又趙家

望霍山

巖岫明人眼嵯峨撐碧空正名尊太岳秩祀亞三公雪  
暗泉流澀雲蒸石勢雄所嗟迫行旅未獲叩靈宮

淮陰侯墓

甫離胯下執兵權高世勳名已爛然怪得生平輕絳灌  
殘骸猶占萬峰巔

雀鼠谷

土坑冷無煙夜分氣淒惻啟戶整行裝一庭霜月白跨  
馬行數里依稀見曙色迤邐冠雀津夾立積鐵壁汾流  
出中間束縛益蕩激閣道亘崖半偃仄瞰不測前驅振  
金鈴後騎躡其迹登降遞隱現不離一水側我生閱奇  
險劍棧曾未識心揣將無同顧步喪精魄造物何恢恢



設此觀人力古來幾雄才長驅遂奮戟廢興迭相倚所  
恃非阻阨行客獨躊躇蹙蹙安所迫

郭林宗墓

明哲何曾學苟同登龍元不愧高風潁川弔客難更僕  
名士無如陳仲弓

大陵

熒熒好女抱琴來尤物從知是禍胎誰向沙邱燒麥飯  
叢臺何似魏銅臺

芹泉驛

侵曉策征騎取逕沿迴溪折旋屢涉水我行忽東西境  
轉厯平原路豁風淒淒足寒傷我心穿鎧如木雞下馬

隨馬尾劫劫踏沙泥支體稍和融氣動聲煩嘶奇鬼覺  
森立列喉當路蹊曙開光未顯安能辨高低往往墮溝  
塹同行爲提攜涸鱗聊泥蟠林翮亦窮棲延伫三歎息  
未遠及行迷

井陘故關

地險接居庸巖關凡幾重一門穿削壁萬堞綴縣峰徑  
狹纔通馬時清不舉烽將軍方較射冠劍盡雍容

保定府楊忠愍公祠

公本非言路居然批逆鱗蚍蛇無此膽大鳥舊能神尙  
有忠魂在須知直節伸鈴山遊息地過客唾權臣

涿州張桓侯祠

召虎侔蹤氣激昂橫矛瞋目記當陽忽摧牙爪三分鼎  
未擲頭顱百戰場蜀道羈魂悲杜宇南宮宿將遜椒房  
樓桑村墅元鄰近長護雲車歸故鄉

春日步出右安門

東風吹百草光采何油油但覺物態新不知人事遁出  
郭得曠步愛茲風景幽同行二三人脫略如沙鷗荒園  
偶憩息古寺亦淹留蕭蕭白楊樹邱墳夾道周此中多  
名卿泯沒成千秋時來徒汲汲運去信悠悠人生貴行  
樂內觀兼外游選勝及良辰引滿揚清謳念彼墳中人  
何必非黑頭

金魚池

郊壇森宰爽松柏高參天九衢多塵土此地獨翛然旁  
有魚藻池流傳自金源澄澈沙石碧映帶蒲柳妍居人  
占水利井匭除不蠲于中育文鱗於初頭百千長安豪  
富家曲沼規淪漣買此充玩好飲芳而食鮮文采良足  
庇以茲免烹煎孰云美好物不克終天年我來增戀嫪  
日暮猶洄沿燕姬能醉客且貰珊瑚鞭

### 關河

關河非故國歲序逼清明已見新蒲綠旋看春水生交  
情今舊雨世事短長檠子職空多曠天涯涕泗橫

### 看花

豐臺勺藥知名久不惜攜尊訪綠盤怪得絕無車馬客

好花都向擔頭看

白溝河

層陰不作雨春寒風颭颭道路阻且長我行逾白溝沙  
岸渺空闊中有微茫流卻憶昨經過兩涯迷馬牛波濤  
不可越浩浩無行舟咄哉晉石郎重寶酬恩讐指河此  
爲界坐割燕雲州淪胥隨輾轉版圖不復收鑄鐵成大  
錯事體關千秋構釁乃速禍偷安非貽謀徒令往來客  
攬古重夷猶

趙北口酬別

歸程休憚馬蹄遙相送煩君折柳條三十六陂新漲外  
紅闌數過十三橋

扁鵲祠

上池飲後便通神如此良醫古絕倫  
舍長獨能奇過客當時已見一方人

獻縣河閒獻王祠

帝子眞儒者河閒有故封善書求六藝  
雅樂獻三雍風雨摧朱綴塵煤闕玉容  
荒祠空弔古禱賽屬村農

不寐

行役亦云倦淹留空復情鶯花成昔夢  
煙月歎浮生草惡驢爭棧燈昏鼠上檠  
羈人愁不寐兀坐數殘更

太山

岡巒羅列盡兒孫出震羣推嶽勢尊  
觸石雲垂飛急雨

粘天波活浴朝暎黍禾大備誰祈福草木殊榮亦拜恩  
聖代卽今崇實政不將封禪法義軒

羊叔子故里

峴首悲懷涕結胸老成風議亦從容當時幸建平吳策  
一馬南來得化龍

蒙陰道中

路出東蒙下興言我馬瘖縱橫泉脈碎犂确石痕麤畫  
野通徐兗連岡表繹鳧顙與舊封城落日弔榛蕪

項王祠

陰風森寒吹桂醕憤王肯裂淚如雨烏騅伏地影蕭蕭  
帳中美人寂無語鴻門杯酒釋沛公乘人之弱非英雄

三舍不聞報楚子背約乃踰鴻溝東漢軍決勝多奇策  
田父已蒙紿大澤亭長安知真長者況復千金縣賞格  
吾爲故人擲吾頭一生倔強死不休卯金家兒每叵信  
笑彼縛虎白門樓

村家

清景銷煩暑披尋午睡餘柳風驅犢健槐雨綴蟬疎短  
援門雙扇平橋水一渠村家塵事少便擬卜鄰居

漂母祠

南昌亭長曾寄食晨炊蓐食巧相厄泗上亭長曾築壇  
野雞啄人血斑斑亭長妻相終始老母乃飯信哀其飢  
欲死國士死生由女子



野老

野老真淳朴公然黃髮皤歡情榆社洽閒話豆棚多土  
裕桑麻長時清風雨和翠華存問處幾度沐恩波

董翌之邀予適蜀作此答之

我讀杜老蜀中詩因知蜀中山水壯生平足跡飽遊歷  
側身西望空惆悵董君過我話綢繆邀我同作西川遊  
感君意氣飲君酒胸中塊壘如山邱雙江分流聲屈刻  
蛾眉天半雪花白瞿唐劍閣阻高深當時誰闢蠶叢國  
五丁力盡崖石傾杜宇魂歸林月黑英雄高視復偶然  
公孫帝胄皆陳迹琴臺日暮弔相如死後偏留封禪書  
揚子深湛官落拓美新亦作莽大夫古來文士安足道

胥詩四

得志大半成姦諛我今倦遊甘寂寂征衫已澣風塵色  
錦城雖好不如家軼里有身未輕擲去矣無爲徒愴神  
離亭重與絮新尊九折叩陳方叱馭王尊何必非忠臣  
豆腐

古詩

虛堂夜氣清起坐披羅幄蕭然見瘦影熒熒耿秋燭寒  
蟲吟已微賓鴻起相續嘹唳時一聲中懷忽振觸生平  
素心人相望遠山曲豈無空中書發緘不忍讀陰言夢  
想勞感茲景光促齊首而雁行願爲驂與服

蒹葭

渺渺愁心結  
淒淒極目同  
江湖勞遠夢  
身世怯秋風  
危樹波平檻  
孤舟雪打篷  
蹉跎余有恨  
相對此衰叢

蕭山汪氏雙節詩

天語褒奇節  
煌煌綽楔新  
綱常千古事  
巾幗兩完人  
仲氏悲先殞  
孤兒生不辰  
令名思必果  
持以答吾親

過文石山房有感攷園先生

安昌絃管最風流  
池館荒涼幾度秋  
豈有虎賁隣北海  
空餘馬策痛西州  
他年國士誰青眼  
此日書生已白頭  
瓠落自慙知遇厚  
一尊重與酌松楸

胥石詩存卷四